



SURUHANJAYA PILIHAN RAYA MALAYSIA

## KENYATAAN MEDIA

Bil. 38 /2019

### PROSES PENAMAAN CALON PILIHAN RAYA KECIL (PRK) DUN N.27 RANTAU, NEGERI SEMBILAN

1. Hari ini proses Penamaan Calon bagi Pilihan Raya Kecil (PRK) DUN N.27 Rantau telah dijalankan.
2. Selepas tempoh penamaan calon ditutup pada jam **10.00 pagi**, SPR telah menerima sebanyak **4 kertas** pencalonan bagi PRK ini.

#### SENARAI PENCALONAN YANG DITERIMA:

- |      |                          |                      |               |
|------|--------------------------|----------------------|---------------|
| i)   | MOHAMAD BIN HAJI HASAN   | ( BARISAN NASIONAL ) | ( 9.05 pagi ) |
| ii)  | MALARVIZHI A/P M.RAJARAM | ( BEBAS )            | ( 9.07 pagi ) |
| iii) | MOHD NOR BIN YASSIN      | ( BEBAS )            | ( 9.08 pagi ) |
| iv)  | STRERAM A/L SINNASAMY    | ( PAKATAN HARAPAN )  | ( 9.08 pagi ) |

3. Dengan selesai proses penamaan calon tersebut, maka **bermulalah tempoh rasmi berkempen** sehingga jam **11.59 malam, 12 April 2019.**

#### PEMANTAUAN KEMPEN OLEH PP-KPR

4. Bagi tujuan memantau aktiviti berkempen sepanjang tempoh rasmi berkempen, SPR telah menubuhkan **EMPAT (4)** Pasukan Penguat Kuasa Kempen Pilihan Raya (PP-KPR) selaras dengan peruntukan undang-undang di bawah **Seksyen 27B Akta Kesalahan Pilihan Raya 1954.**

5. SPR telah menyediakan **SURAT AKU JANJI** untuk ditandatangani oleh calon yang mengandungi **10 JANJI** mematuhi segala peraturan yang ditetapkan di bawah Akta Kesalahan Pilihan Raya 1954 dan mana-mana undang-undang serta peraturan yang berkaitan sepanjang tempoh 14 hari berkempen bermula selepas pengisytiharan nama calon-calon pada 30 Mac 2019 sehingga 11.59 malam pada 12 April 2019.
6. Untuk makluman, pihak **SPRM juga telah membuka bilik gerakannya** di PRK Rantau ini dan akan beroperasi selama 24 jam selain daripada operasi di Pejabat SPRM Negeri Sembilan dan Ibu Pejabat di Putrajaya pada waktu pejabat. Pegawai-pegawai SPRM juga akan membuat pemantauan di lapangan.

### **PEMASANGAN BAHAN KEMPEN**

7. Calon **DIBENARKAN** untuk mempamer dan mengedarkan bahan kempen pilihan raya yang mengandungi gambar calon, lambang/symbol parti dan gambar pemimpin parti yang diwakilinya termasuklah lambang/symbol parti dan gambar pemimpin parti komponen/gabungan/pakatan.
8. Apa-apa bahan kempen yang boleh digunakan seperti iklan, surat sebaran, pelekat dan poster hendaklah mengandungi nama dan alamat pencetak dan penerbitnya **KECUALI** bendera, poster symbol parti dan gambar pemimpin parti atau calon yang bertanding.
9. Bahan kempen yang mengandungi perkataan-perkataan yang boleh **mengembangkan perasaan jahat, berunsur perkauman dan menyentuh sensitiviti keagamaan atau yang boleh mendatangkan permusuhan** adalah **TIDAK DIBENARKAN**.
10. PP-KPR boleh menurunkan bahan kempen yang berunsur negatif atau melanggar peruntukan undang-undang pilihan raya.

## **CERAMAH PERLU MENDAPATKAN PERMIT POLIS**

11. Setiap ceramah perlu mendapatkan permit daripada Polis Diraja Malaysia (PDRM) dan PDRM berkuasa untuk mengambil tindakan bagi aktiviti ceramah yang dijalankan tanpa permit.

## **PENGUMUMAN KEPUTUSAN PILIHAN RAYA**

12. Dijangkakan Keputusan PRK akan diumumkan **SEBELUM jam 10.00 malam.**

## **PEMERHATI PILIHAN RAYA**

13. Bagi PRK ini, SPR telah melantik **137 orang pemerhati pilihan raya** daripada **15 buah organisasi** yang terdiri daripada agensi kerajaan, Badan Bukan Kerajaan (NGO), **organisasi dan individu yang berkelayakan** untuk memantau proses pilihan raya ini.

## **JANGKAAN PERATUSAN KELUAR MENGUNDI:**

14. SPR menjangkakan peratusan keluar mengundi untuk PRK ini adalah lebih kurang **70 peratus.**
15. SPR berharap para pengundi dapat keluar mengundi untuk menunaikan hak dan tanggungjawab mereka.
16. SPR juga memohon semua pihak khususnya pihak media agar turut memainkan peranan untuk menggalakkan pengundi agar keluar mengundi pada 13 April 2019 nanti.

## **ASPEK PENAMBAHBAIKAN**

17. Pada PRK ini penambahbaikan-penambahbaikan yang dilaksanakan di beberapa PRK sebelum ini akan diteruskan antaranya;

- i) Bagi pengundi yang berumur **60 tahun** dan ke atas akan diwujudkan dua saluran.
- ii) Tambahan waktu mengundi selama **30 minit** iaitu dari jam **8 pagi** hingga jam **5.30 petang** (sebelumnya **8.00 pagi -5:00 petang** sahaja).
- iii) Menambah **11 saluran baharu** di Pusat Mengundi yang ramai pengundi. (**44 Saluran kepada 55 saluran**)
- iv) **Pengundi OKU** mengundi di saluran 1. Seramai **541 orang** pengundi OKU telah dikenal pasti dan berdaftar dengan JKM.
- v) SPR akan menyiarkan proses pengiraan undi **live streaming** melalui **Facebook** dengan mengambil kira kesesuaiannya di satu saluran di Pusat Mengundi yang terpilih. Usaha ini adalah sebagai satu pendedahan dan kesedaran kepada masyarakat mengenai proses pengiraan undi semasa pilihan raya.
- vi) Penghantaran Kad Pengundi (**Voters Card**) yang mengandungi maklumat daftar pemilih seperti Pusat Mengundi, Saluran, Bilangan dan Masa Mengundi kepada **20,922 orang** pengundi untuk kemudahan dan kelancaran proses mengundi. **Walau bagaimanapun pengundi masih perlu membawa kad pengenalan sebagai pengesahan identiti untuk mengundi.**

### **SEMAKAN DAFTAR PEMILIH**

- 18. Bagi pengundi yang tidak menerima *Voters Card* mereka disaran membuat semakan Daftar Pemilih lebih awal untuk mengetahui **maklumat pusat mengundi, saluran mengundi dan nombor bilangan** mereka melalui **portal SPR** ([www.spr.gov.my](http://www.spr.gov.my)) atau menelefon ke talian **03-88927018** atau melalui **SMS 15888** atau menyemaknya melalui **aplikasi MySPR Semak**.
- 19. Bagi pengundi yang telah mengetahui maklumat **Pusat Mengundi, Saluran Mengundi dan juga nombor bilangan**, mereka boleh **mencatat maklumat berkenaan dan membawa catatan itu** ke tempat mengundi tanpa perlu menyemaknya lagi di barung SPR.

## **EKSPEKTASI SPR**

20. SPR berharap semua pengundi di DUN N.27 Rantau ini agar dapat menjalankan tanggungjawab mereka sebagai pengundi dan tidak mensia-siakan HAK serta UNDI mereka.
21. SPR juga berharap agar aktiviti berkempen akan berjalan dengan penuh harmoni serta tidak melanggar undang-undang dan peraturan yang ditetapkan.

## **PENGHARGAAN DAN TERIMA KASIH**

22. SPR merakamkan ucapan TAHNIAH dan SYABAS kepada Encik Mohd Nizam bin Tajul Arus, Pegawai Pengurus Pilihan Raya dan pasukannya kerana telah menjalankan tanggungjawab dengan lancar pada hari ini.
23. Penghargaan dan terima kasih juga diucapkan kepada SAC Dato'Mohamad bin Mat Yusop, Ketua Polis Negeri, SUPT Mohd Rosli bin Ishak, Ketua Polis Daerah dan anggota PDRM yang telah berjaya memastikan aspek keselamatan terkawal dan suasana tenang.
24. Terima kasih kepada Jabatan Insolvensi dan anggota mereka.
24. Terima kasih kepada Encik Mohd Heikal bin Kamarudin, Pengarah SPR Negeri Sembilan dan anggota Pejabat SPR Negeri.
25. Terima kasih kepada pihak media dan semua pihak yang terlibat secara langsung dan tidak langsung.

Sekian, terima kasih.

**DR AZMI SHAROM**

Timbalan Pengerusi SPR

Tarikh: 30 Mac 2019 / 23 Rejab 1440H